



Comhairle an
Aontais Eorpaigh

An Bhruiséil, 3 Nollaig 2021
(OR. en)

14586/21

**Comhad Idirinstitiúideach:
2018/0005(CNS)**

**FISC 223
ECOFIN 1190**

NÓTA

ó:	An Uachtaránacht
chuig:	An Chomhairle
Ábhar:	Togra le haghaidh TREOIR ÓN gCOMHAIRLE lena leasaítear Treoir 2006/112/CE a mhéid a bhaineann le rátaí cánach breisluacha - Téacs comhréitigh ón Uachtaránacht

Gheobhaidh na toscaireachtaí i gceangal leis seo téacs na dréacht-Treorach ón gComhairle lena leasaítear Treoir 2006/112/CE maidir le rátaí cánach breisluacha a tíolacadh d'fhonn teacht ar chomhaontú maidir le cur chuige ginearálta ag an gcruinniú a bheidh ag an gComhairle (Gnóthaí Eacnamaíocha agus Airgeadais) an 7 Nollaig 2021.

[DRÉACHT-]TREOIR (AE).../... ÓN gCOMHAIRLE

an ...

lena leasaítear Treoracha 2006/112/CE agus (AE) 2020/285 a mhéid a bhaineann le rátaí cánach breisluacha

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 113 de,

Ag féachaint don togra ón gCoimisiún Eorpach,

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Pharlaimint na hEorpa¹,

Ag féachaint don tuairim ó Choiste Eacnamaíoch agus Sóisialta na hEorpa²,

Ag gníomhú di i gcomhréir le nós imeachta reachtach speisialta,

De bharr an mhéid seo a leanas:

- (1) Is é is aidhm do na rialacha maidir le rátaí cánach breisluacha (CBL) mar a leagtar amach faoi láthair i dTreoir 2006/112/CE³ ón gComhairle feidhmiú an mhargaidh inmheánaigh a chaomhnú agus saobhadh iomaíochta a sheachaint. Ceapadh na rialacha breis agus scór bliain ó shin bunaithe ar phrionsabal an tionscnaimh. Ina theachtaireachtaí maidir le plean gníomhaíochta CBL an 7 Aibreán 2016 dar teideal Towards a single EU VAT area – Time to decide [I dtreo Limistéar CBL aonair san Aontas Eorpach – an t-am le cinneadh a dhéanamh] agus an 4 Deireadh Fómhair 2017 maidir leis an obair leantach ar an bplean gníomhaíochta CBL dar teideal Towards a single EU VAT area – Time to act [I dtreo Limistéar CBL aonair san Aontas Eorpach – an t-am le gníomhú], d'fhógair an Coimisiún go raibh sé ar intinn aige na rialacha sin a choigeartú le haghaidh córas cinntitheach CBL le haghaidh trádáil trasteorann gnólacht le gnólacht (B2B) in earraí idir na Ballstáit a bheadh bunaithe ar an gcánachas sa Bhallstát.
- (2) Faoi chóras ina ngearrfaí cáin ar sholáthar earraí agus seirbhísí sa Bhallstát cinn scríbe, ní bhainfeadh soláthróirí aon tairbhe shuntasach as a bheith bunaithe i mBallstát a bhfuil ráta níos ísle aige. Faoi chóras den sórt sin, ní chuirfeadh níos mó éagsúlachta sna rátaí CBL isteach ar fheidhmiú an mhargaidh aonair ná ní chruthódh sé saobhadh iomaíochta. Sna himthosca sin, b'iomchuí breis solúbthachta a thabhairt do Bhallstáit agus rátaí á socrú acu.

¹ IO C , , lch. .

² IO C , , lch. .

³ Treoir 2006/112/CE ón gComhairle an 28 Samhain 2006 maidir leis an gcomhchóras cánach breisluacha (IO L 347, 11.12.2006, lch. 1).

- (2a) Ba cheart na hearraí agus na seirbhísí a bheadh incháilithe le haghaidh rátaí laghdaithe a dhíriú ar leas an tomhaltóra deiridh agus cuspóirí leasa ghinearálta a shaothrú. Chun castacht nach bhfuil gá léi agus ardú ina dhiaidh sin ar chostais ghnó a sheachaint, go háirithe i gcás trádáil laistigh den Chomhphobal, ba cheart é a bheith soiléir nuair a roghnaítear earraí agus seirbhísí dá réir go mbeidh rátaí laghdaithe infheidhme ar feadh an tslabhra tráchtála ar fad.
- (2b) Ba cheart don chreat dlíthiúil lena gceadaítear rátaí laghdaithe a chur i bhfeidhm a bheith comhchuí ar an iomlán le beartais eile de chuid an Aontais amhail Rialachán (AE) 2021/522 ó Pharlaimint na hEorpa agus ón gComhairle an 24 Márta 2021 lena mbunaítear Clár do ghníomhaíochtaí an Aontais i réimse na sláinte ('Clár EU4Health') don tréimhse 2021-2027, agus lena n-aisghairtear Rialachán (AE) Uimh. 282/2014⁴ agus an Teachtaireacht ón gCoimisiún chuig Parlaimint na hEorpa, chuig an gComhairle Eorpach, chuig an gComhairle, chuig Coiste Eacnamaíoch agus Sóisialta na hEorpa agus chuig Coiste na Réigiún *The European Green Deal* [An Comhaontú Glas don Eoraip]⁵. Chun a chur ar chumas na mBallstát rátaí laghdaithe a chur i bhfeidhm agus athléimneacht a gcóras sláinte a neartú, is iomchuí raon feidhme na n-earraí agus na seirbhísí a mheastar a bheith riachtanach chun tacú le soláthar cúraim sláinte agus chun míchumais a chúiteamh agus a shárú a leathnú. Thairis sin, ba cheart an deis a thabhairt freisin do na Ballstáit rannchuidiú le geilleagar atá aeráidneodrach agus glas trí bhíthin rátaí laghdaithe a chur i bhfeidhm ar sholáthairtí atá neamhdhiobhálach don chomhshaol agus, ag an am céanna, deireadh a chur de réir a chéile le cóir fhabhrach soláthairtí atá díobhálach don chomhshaol a ullmhú.
- (3) Ní mór cóir chomhionann a chur ar na Ballstáit uile agus, dá bhrí sin, ní mór na féidearthachtaí céanna a thabhairt dóibh rátaí laghdaithe a chur i bhfeidhm, ba cheart, áfach, na rátaí sin a bheith fós sin ina n-eisceacht ar an ráta caighdeánach. Is féidir an chóir chomhionann sin a bhaint amach trína chur ar chumas gach Ballstáit, laistigh de theorainneacha sainithe, dhá ráta laghdaithe d'íosmhéid 5 % a chur i bhfeidhm ar na hearraí agus seirbhísí incháilithe agus ráta laghdaithe is lú ná an t-íosmhéid 5 % agus díolúine lena ngabhann an ceart CBL ar ionchur a asbhaint.
- (4) Á chur san áireamh gur gá leathadh ar rátaí laghdaithe a sheachaint ar chúiseanna buiséadacha agus de bharr phrionsabal na córa comhionainne, ba cheart cead a bheith ag na Ballstáit rátaí laghdaithe a chur i bhfeidhm nach lú ná an t-íosmhéid 5 % ar suas le ceithre phointe is fiche d'earraí agus seirbhísí a liostaítear in Iarscríbhinn III a ghabhann le Treoir 2006/112/CE. Ar an gcúis chéanna tá an tsaoirse ag na Ballstáit ráta laghdaithe ar lú é ná an t-íosmhéid 5 % agus díolúine lena ngabhann an ceart CBL ar ionchur a asbhaint a chur i bhfeidhm ach ní ach ar uasmhéid de sheacht bpointe a liostaítear in Iarscríbhinn III, arna roghnú as measc na hearraí agus na seirbhísí a mheastar go bhfreastalaíonn siad ar riachtanais bhunúsacha, eadhon, na cinn sin a bhaineann le soláthar earraí bia, uisce, cógas leighis, táirgí cógaisíochta, táirgí sláinte agus sláintíochta, iompar daoine agus roinnt míreanna cultúrtha (leabhair, nuachtáin agus tréimhseacháin), nó as measc soláthar earraí agus seirbhísí a liostaítear in Iarscríbhinn III a gcuireann Ballstáit eile rátaí laghdaithe is lú ná an t-íosmhéid 5 % i bhfeidhm orthu nó díolúintí lena ngabhann an ceart CBL ar ionchur a asbhaint ar an gcoinníoll go ndéanfar na spriocdhátaí is infheidhme a urramú. Is iomchuí an tréimhse ama is gá chun oiriúnú do na teorainneacha sin a thabhairt do na Ballstáit a bhfuil na rátaí laghdaithe nó na díolúintí sin á gcur i bhfeidhm acu cheana.

⁴ IO L 107, 26.3.2021, lch. 1

⁵ COM(2019) 640 final an 11 Nollaig 2019

- (4a) Is iomchuí grianphainéil a áireamh i measc na seacht bpointe sin i gcomhréir le gealltanais chomhshaoil an Aontais maidir le dícharbónú agus leis an gComhaontú Glas agus an deis a thabhairt do na Ballstáit úsáid foinsí inathnuaite fuinnimh a chur chun cinn freisin trí bhithin rátaí laghdaithe CBL. Chun tacú leis an aistriú i dtreo úsáid foinsí inathnuaite fuinnimh agus chun neamhthuilleamaíocht an Aontais maidir le fuinneamh a chothú, is gá a cheadú do na Ballstáit feabhas a chur ar rochtain na dtomhaltóirí deiridh ar fhoinsí fuinnimh glasa.
- (4b) Ba cheart féachaint ar fheidhmiú aon cheann de na roghanna thuas mar bheart, atá leabaithe i loighic chóras na rátaí CBL, a glacadh ar chúiseanna sóisialta atá sainithe go soiléir chun tairbhe don tomhaltóir deiridh nó ar mhaithe leis an leas ginearálta.
- (4c) Mar aon le rialacha ginearálta maidir le rátaí CBL, tá roinnt maoluithe ann cheana a cheadaíonn do Bhallstáit áirithe rátaí níos lú a chur i bhfeidhm. Tá údar leis na rátaí níos lú sin i ngeall ar ghnéithe sonracha geografacha nó ar chúiseanna sóisialta atá chun leas an tomhaltóra deiridh nó ar mhaithe leis an leas ginearálta. D'fhéadfadh na rátaí níos lú sin a bheith ábhartha do Bhallstáit eile. I gcomhréir le prionsabal na córa comhionainne, is iomchuí, dá bhrí sin, foráil a dhéanamh maidir le rogha, oscailte do gach Ballstát, rátaí níos lú a chur i bhfeidhm ar na hearraí agus ar na seirbhísí céanna a bhfuil feidhm ag rátaí níos lú ina leith i mBallstáit eile agus faoi na coinníollacha céanna. Chun an uasteorainn seacht bpointe thuas a chomhlíonadh, ba cheart do na Ballstáit a bhí ag cur na rátaí níos lú sin i bhfeidhm ar níos mó ná seacht bpointe de sholáthairtí earraí agus seirbhísí a liostaítear in Iarscríbhinn III an 1 Eanáir 2021 teorainn a chur ar chur i bhfeidhm rátaí laghdaithe ar lú iad ná an t-íosmhéid 5 % agus ar chur i bhfeidhm díolúintí lena ngabhann an ceart CBL ar ionchur a asbhaint go seacht bpointe d'Iarscríbhinn III faoin 1 Eanáir 2032 nó faoi thráth glactha na socrúithe cinntitheacha; cibé acu is túisce. Ní dhéanann na leasuithe thuas difear do na socrúithe le haghaidh maoluithe a bhaineann le cur i bhfeidhm na ndíolúintí gan an ceart CBL ar ionchur a asbhaint a leagtar amach in Iarscríbhinn X de Threoir 2006/112/CE.
- (4d) Ina theannta sin, tugann roinnt maoluithe eile cead do Bhallstáit áirithe faoi láthair rátaí laghdaithe nach lú ná 12 % a chur i bhfeidhm ar earraí agus seirbhísí nach liostaítear in Iarscríbhinn III. I bhfianaise leibhéil na rátaí laghdaithe sin a bheith gar don ráta caighdeánach agus i gcomhréir le prionsabal na córa comhionainne, is iomchuí foráil a dhéanamh do rogha, oscailte do gach Ballstát, rátaí laghdaithe nach lú ná 12 % a chur i bhfeidhm ar na hearraí agus na seirbhísí céanna sin a ndéantar rátaí laghdaithe nach lú ná 12 % a chur i bhfeidhm orthu i mBallstáit eile agus faoi na coinníollacha céanna.

- (4e) Maidir le rátaí laghdaithe nach lú ná 12 % ar sholáthairtí earraí agus seirbhísí nach liostaítear in Iarscríbhinn III, rátaí laghdaithe is lú ná 5 % agus díolúintí lena ngabhann an ceart CBL ar ionchur a asbhaint i gcás aon phointí d'Iarscríbhinn III seachas pointí (1) go (6) agus pointe (10c), féadfaidh Ballstáit eile iad a chur i bhfeidhm, lena n-áirítear Ballstáit a chuireann na rátaí laghdaithe sin agus na díolúintí sin i bhfeidhm faoi láthair agus ar mhaith leo rátaí laghdaithe nach lú ná 12 % a chur i bhfeidhm ar sholáthairtí earraí agus seirbhísí nach liostaítear in Iarscríbhinn III, agus rátaí is lú ná 5 % nó díolúintí lena ngabhann an ceart CBL ar ionchur a asbhaint seachas na cinn is infheidhme cheana féin, a fhad is a urramaítear struchtúr na rátaí CBL dá bhforáiltear sa Treoir seo agus na coinníollacha a chuireann na Ballstáit a bhfuil rátaí laghdaithe nó díolúintí acu an 1 Eanáir 2021 i bhfeidhm.
- (4f) Maidir leis na Ballstáit a raibh rátaí laghdaithe á gcur i bhfeidhm acu nó a raibh díolúintí á ndeonú acu lena ngabhann an ceart CBL ar ionchur a asbhaint bunaithe ar mhaoluithe an 1 Eanáir 2021, ba cheart dóibh a chur in iúl don Choiste um CBL príomhfhorálacha agus príomhchoinníollacha maoluithe ina ndlí náisiúnta, arna gcur i bhfeidhm an 1 Eanáir 2021 agus a dtabharfar rochtain orthu do Bhallstáit eile. Chun deimhneacht dhlíthiúil a áirithiú agus chun rochtain chomhionann ar na maoluithe sin a chumasú do na Ballstáit uile agus bunaithe ar fhaisnéis arna soláthar, faoin spriocdháta atá leagtha síos ag na Ballstáit lena mbaineann, déanfaidh an Coimisiún tuarascáil a ullmhú agus a dháileadh ar na Ballstáit uile ina mbeidh liosta iomlán de na hearraí agus de na seirbhísí a gcuirfear na rátaí laghdaithe nó na díolúintí sin i bhfeidhm ina leith díreach tar éis dó an fhaisnéis a fháil. Tá sé ríthábhachtach go gcomhlíonfar an spriocdháta chun an fhaisnéis sin a chur in iúl chun a áirithiú go mbeidh an rochtain chéanna ag na Ballstáit uile ar mhaoluithe.
- (4g) Ar bhonn na faisnéise arna dáileadh ag an gCoimisiún, ba cheart go mbeadh na Ballstáit in ann rátaí laghdaithe agus díolúintí lena ngabhann an ceart CBL a asbhaint a chur i bhfeidhm ar sholáthairtí earraí agus seirbhísí ar a gcuireann Ballstáit eile na rátaí agus na díolúintí sin i bhfeidhm ar choinníoll go gcuirtear rátaí laghdaithe agus díolúintí i bhfeidhm faoi na coinníollacha céanna is infheidhme sna Ballstáit a bhfuil na rátaí agus na díolúintí sin á gcur i bhfeidhm acu cheana féin. Chun na roghanna sin a fheidhmiú, ba cheart do na Ballstáit rialacha mionsonraithe a ghlacadh agus téacs na bhforálacha arna nglacadh a chur in iúl don Choiste CBL. Bunaithe ar an teachtaireacht sin, ba cheart don Choimisiún tuarascáil a chur faoi bhráid na Comhairle ina bhfuil liosta cuimsitheach d'earraí agus de sheirbhísí a gcuireann Ballstáit rátaí laghdaithe agus díolúintí i bhfeidhm ina leith.

- (5) I bhfianaise an ghá atá le liosta na n-earraí agus na seirbhísí atá incháilithe do rátaí laghdaithe a nuachóiriú agus a thabhairt cothrom le dáta, ba cheart Treoir 2006/112/CE a leasú chun go bhféadfar rátaí laghdaithe a chur i bhfeidhm le haghaidh cuspóirí sonracha beartais shóisialta, chun soiléireacht a áirithiú agus chun prionsabal na neodrachta a chur san áireamh, eadhon, tríd an gcóir chéanna a áirithiú, i dtéarmaí rátaí CBL, i ndáil le hearraí áirithe a thógáil ar cíós, a léasú nó a sholáthar.
- (5a) Chun an deis a thairiscint do na Ballstáit tacú leis an aistriú i dtreo córais téimh atá neamhdhíobhálach don chomhshaol a úsáid agus i gcomhréir le gealltanais chomhshaoil an Aontais maidir le dícharbónú, áirítear sa bhreis air sin in Iarscríbhinn III an fhéidearthacht do na Ballstáit ráta laghdaithe a chur i bhfeidhm maidir le córais téimh astaíochtaí ísle atá thar a bheith éifeachtúil a sholáthar agus a shuiteáil, ar córais iad a chomhlíonann critéir na reachtaíochta comhshaoil.
- (5b) Tá ról lárnach ag an digiteáil ó thaobh luach a chruthú agus iomaíochas a chothú. Déanann an tInnéacs um an nGeilleagar Digiteach agus an tSochaí Dhigiteach (DESI) feidhmíocht dhigiteach na mBallstát a thomhas agus a rangú bunaithe ar tháscairí réamhshainithe lena léirítear neamhréitigh shuntasacha maidir leis an bhforbairt dhigiteach. Chun drochchlúdach seirbhísí rochtana idirlín a shárú agus d'fhonn a bhforbairt a chur chun cinn, ba cheart do na Ballstáit a bheith in ann ráta laghdaithe a chur i bhfeidhm ar na seirbhísí sin. Ba cheart cur i bhfeidhm ráta laghdaithe ar sheirbhísí rochtana idirlín a chur in oiriúint do na cuspóirí a leagtar amach sa bheartas náisiúnta maidir le digiteáil agus, dá réir sin, a theorannú sa raon feidhme. De réir Rialachán (AE) 2015/2120⁶, soláthraíonn seirbhísí rochtana idirlín nascacht, ach ní chuimsíonn siad an t-inneachar a sholáthraítear tríd an idirlíon.
- (5c) Ina theannta sin, i bhfianaise chlaohlú digiteach an gheilleagair, ba cheart go mbeadh na Ballstáit in ann foráil a dhéanamh maidir le gníomhaíochtaí, lena n-áirítear imeachtaí, atá beosruthaithe, go bhfaighidís an chóir chéanna a thugtar dóibh sin atá incháilithe do rátaí laghdaithe nuair a dhéantar iad a sholáthar go fisiciúil.
- (5d) Chun cánachas sa Bhallstát tomhaltais a áirithiú, is gá, go mbeidh na seirbhísí go léir is féidir a sholáthar do chustaiméir trí mheán leictreonach, incháinithe san áit ina bhfuil an custaiméir bunaithe, ina bhfuil a sheoladh buan nó ina gcónaíonn sé de ghnáth. Dá bhrí sin, is gá modhnú a dhéanamh ar na rialacha lena rialaítear an áit ina soláthraítear seirbhísí a bhaineann le gníomhaíochtaí den sórt sin.
- (6) Chun deimhneacht dhlíthiúil a sholáthar, is gá a shoiléiriú, i gcás na n-eagraíochtaí atá tiomnaithe don leas sóisialta, gurb iad gníomhaíocht ghinearálta agus cuspóirí ginearálta na heagraíochta ina hiomláine, gan beann ar thairbhí deiridh an tsoláthair earraí nó seirbhísí, atá le breithniú agus measúnú á dhéanamh ar na ceanglais maidir le ráta laghdaithe a chur i bhfeidhm.

⁶ Rialachán (AE) 2015/2120 ó Pharlaimint na hEorpa agus ón gComhairle an 25 Samhain 2015 lena leagtar síos bearta maidir le rochtain oscailte ar an idirlíon agus muirir mhiondíola ar chumarsáid rialáilte laistigh den Aontas agus lena leasaítear Treoir 2002/22/CE agus Rialachán (AE) Uimh. 531/2012 (IO L 310, 26.11.2015, lch. 1).

- (6a) Thairis sin, ba cheart Treoir 2006/112/CE a leasú chun gur féidir rátaí laghdaithe a chur i bhfeidhm i líon teoranta staidéanna sonracha ar chúiseanna sóisialta, chun leas an tomhaltóra deiridh agus chun cuspóir a bhaint amach atá ar mhaithe leis an leas ginearálta. Dá bhrí sin, leathnaítear liosta na n-earraí agus na seirbhísí atá incháilithe le haghaidh rátaí laghdaithe chun líon teoranta maoluithe den sórt sin atá ann cheana a chur san áireamh.
- (7) Chruthaigh paindéim COVID-19 gur gá Treoir 2006/112/CE a oiriúnú chun an creat dlíthiúil a chur faoi réir chun aghaidh a thabhairt ar ghéarchéimeanna a bheidh ann amach anseo agus, dá bhrí sin, chun cur ar chumas na mBallstát freagairt go tapa d'ímthosca eisceachtúla, amhail paindéimí, géarchéimeanna daonnúla nó tubaistí nádúrtha. Chun na críche sin, faoi na coinníollacha céanna, ba cheart an deis a bheith ag na Ballstáit a d'údaraigh an Coimisiún díolúine ó CBL a chur i bhfeidhm ar earraí arna n-allmhairiú chun tairbhe d'íospartaigh thubaiste, díolúine lena ngabhann in-asbhainteacht CBL arna íoc ag an gcéim roimhe sin a chur i bhfeidhm i ndáil le soláthairtí laistigh den Aontas agus soláthairtí intíre na n-earraí sin agus na seirbhísí a bhaineann leis na hearraí sin chuig na comhlachtaí incháilithe chun go mbeidh siad in ann cabhrú le híospartaigh na dtubaistí sin. Mura gcomhlíonfar coinníollacha le haghaidh díolúintí a thuilleadh, ba cheart soláthar earraí agus seirbhísí den sórt sin a bheith faoi réir CBL.
- (8) Ós rud é nach féidir leis na Ballstáit príomhchuspóir na Treorach seo, eadhon liosta na n-earraí agus na seirbhísí atá incháilithe do rátaí laghdaithe a thabhairt cothrom le dáta agus na forais a bhunú chun a áirithiú go mbeidh rochtain chomhionann ag na Ballstáit ar rátaí laghdaithe a chur i bhfeidhm, a ghnóthú go leordhóthanach ach, de bharr na dteorainneacha atá ann cheana, gur fearr is féidir é a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Treoir seo thar a bhfuil riachtanach chun na cuspóirí sin a ghnóthú.
- (9) Rinneadh Treoir 2006/112/CE a leasú le Treoir (AE) 2020/285⁷. Mar gheall ar struchtúr éagsúil rátaí CBL dá bhforáiltear sa Treoir leasaitheach seo, is gá na tagairtí i dTreoir (AE) 2020/285 a leasú.
- (10) I gcomhréir le Dearbhú Comhpháirteach Polaitiúil an 28 Meán Fómhair 2011 ó na Ballstáit agus ón gCoimisiún maidir le doiciméid mhíniúcháin⁸, ghlac na Ballstáit mar chúram orthu féin, i gcásanna a bhfuil údar leo, doiciméad amháin nó níos mó a chur leis an bhfógra maidir lena mbearta trasuite, ar doiciméid iad lena mínítear an gaol idir codanna de threoir agus páirteanna comhfhreagracha na n-ionstraimí náisiúnta trasuite. I ndáil leis an Treoir seo measann an reachtóir go bhfuil údar le doiciméid den sórt sin a tharchur.
- (11) Dá bhrí sin, ba cheart Treoir 2006/112/CE a leasú dá réir sin,

⁷ Treoir (AE) 2020/285 ón gComhairle an 18 Feabhra 2020 lena leasaítear Treoir 2006/112/CE maidir leis an gcomhchóras cánach breisluacha a mhéid a bhaineann leis an scéim speisialta d'fhiontair bheaga agus Rialachán (AE) Uimh. 904/2010 a mhéid a bhaineann leis an gcomhar riaracháin agus leis an malartú faisnéise chun faireachán a dhéanamh ar chur i bhfeidhm ceart na scéime speisialta d'fhiontair bheaga (IO L 62, 2.3.2020, lch. 13).

⁸ IO C 369, 17.12.2011, lch. 14.

TAR ÉIS AN TREOIR SEO A GHLACADH:

Airteagal 1

Leasuithe ar Threoir 2006/112/CE

Leasaítear Treoir 2006/112/CE mar a leanas:

(1) Leasaítear Airteagal 94 mar a leanas:

a) cuirtear an méid seo a leanas in ionad mhír 2:

2. Is é an ráta is infheidhme maidir le hallmhairiú earraí an ráta a chuirtear i bhfeidhm maidir le soláthar earraí comhchosúla laistigh de chríoch an Bhallstáit.”;

b) cuirtear isteach an mhír seo a leanas:

3. De mhaolú ar mhír 2 den Airteagal sin, féadfaidh na Ballstáit a chuireann ráta caighdeánach i bhfeidhm maidir le soláthar saothar ealaíne, míreanna bailitheoirí agus seandachtaí a liostaítear in Iarscríbhinn IX, Cuid A, Cuid B agus Cuid C, ráta laghdaithe a chur i bhfeidhm ar allmhairiú na n-earraí sin laistigh de chríoch an Bhallstáit.’;

(2) Cuirtear an méid seo a leanas in ionad Airteagal 98:

‘Airteagal 98

1. Féadfaidh na Ballstáit uasmhéid de dhá ráta laghdaithe a chur i bhfeidhm.

Socrófar na rátaí laghdaithe mar chéatadán den mhéid inchánach, nach mbeidh níos lú ná 5 % agus nach mbeidh feidhm aige ach amháin maidir leis na soláthairtí earraí agus seirbhísí a liostaítear in Iarscríbhinn III.

Féadfaidh na Ballstáit na rátaí laghdaithe a chur i bhfeidhm ar cheithre phointe is fiche ar a mhéad de sholáthairtí earraí agus seirbhísí a liostaítear in Iarscríbhinn III.

2. Féadfaidh na Ballstáit, de bhreis ar an dá ráta laghdaithe, ráta laghdaithe a chur i bhfeidhm atá níos lú ná íosmhéid 5 % agus díolúine a chur i bhfeidhm lena ngabhann in-asbhainteacht CBL arna íoc ag an gcéim roimhe sin go dtí uasmhéid de sheacht bpointe de sholáthairtí earraí agus seirbhísí a liostaítear in Iarscríbhinn III.

Ní fhéadfar an ráta laghdaithe atá níos lú ná an t-íosmhéid 5 % agus an díolúine lena ngabhann in-asbhainteacht CBL arna íoc ag an gcéim roimhe sin a chur i bhfeidhm ach amháin i leith na bpointí seo a leanas d'Iarscríbhinn III:

a) pointí (1), (2), (3), (4), (5), (6) agus (10c);

b) aon phointe eile d'Iarscríbhinn III a thagann faoi na roghanna dá bhforáiltear in Airteagal 105a(1).

Chun críoch phointe (b) den dara fómhír den mhír seo, measfar go dtagann na hidirbhearta maidir le tithíocht dá dtagraítear sa dara fómhír d'Airteagal 105a(1) faoi phointe (10) d'Iarscríbhinn III.

Na Ballstáit a chuireann rátaí laghdaithe atá níos lú ná an t-íosmhéid 5 % i bhfeidhm, an 1 Eanáir 2021, nó a dheonaíonn díolúintí lena ngabhann in-asbhainteacht CBL arna íoc ag an gcéim roimhe sin do níos mó ná seacht bpointe d'earraí nó seirbhísí a liostaítear in Iarscríbhinn III, cuirfidh siad teorainn le cur i bhfeidhm na rátaí sin chun an chéad fhomhír den mhír seo a chomhlíonadh faoin 1 Eanáir 2032, nó trí na socruithe cinntitheacha dá dtagraítear in Airteagal 402, cibé acu is túisce, a ghlacadh. Beidh sé de shaoirse ag na Ballstáit a chinneadh cé na pointí nó catagóirí soláthairtí earraí nó seirbhísí a leanfaidh siad de na rátaí laghdaithe sin a chur i bhfeidhm orthu agus/nó na díolúintí sin a dheonú dóibh.

3. Ní bheidh feidhm ag na rátaí laghdaithe agus ag na díolúintí dá dtagraítear i míreanna 1 agus 2 maidir le seirbhísí a sholáthraítear go leictreonach, seachas na seirbhísí sin a liostaítear faoi phointí (6), (7), (8) agus (13) d'Iarscríbhinn III.

4. Agus na rátaí laghdaithe agus díolúintí dá bhforáiltear sa Treoir seo á gcur i bhfeidhm, féadfaidh na Ballstáit an Ainmníocht Chomhcheangailte agus/nó aicmiú staidrimh táirgí de réir gníomhaíochta a úsáid chun cumhdach beacht na catagóire lena mbaineann a bhunú.';

(3) Cuirtear an méid seo a leanas in ionad Airteagal 99:

'Airteagal 99

Ní bheidh feidhm ag na rátaí laghdaithe agus ag na díolúintí dá dtagraítear in Airteagal 98(1) agus (2) maidir le soláthairtí saothar ealaíne, earraí agus seandachtaí inbhailithe lena mbaineann socruithe speisialta Chaibidil 4 de Theideal XII.';

- (4) Cuirtear an méid seo a leanas in ionad Airteagal 100:

‘Airteagal 100

Faoi 31 Nollaig 2028 agus gach 5 bliana ina dhiaidh sin, cuirfidh an Coimisiún tuarascáil faoi bhráid na Comhairle maidir le raon feidhme Iarscríbhinn III, lena ngabhfaidh aon tograí iomchuí, i gcás inar gá.’;

- (4a) I gCaibidil 2 de Theideal VIII, cuirtear an Roinn seo a leanas isteach:

‘Roinn 2a
Cásanna eisceachtúla

Airteagal 101a

1. I gcás inar dheonaigh an Coimisiún údarú do Bhallstát de réir na chéad mhíre d’Airteagal 53 de Threoir 2009/132/CE⁹ chun díolúine a chur i bhfeidhm maidir le hearraí allmhairiúcháin chun tairbhe d’íospartaigh thubaiste, féadfaidh an Ballstát sin díolúine a dheonú lena ngabhann in-asbhainteacht CBL arna íoc ag an gcéim roimhe sin faoi na coinníollacha céanna, maidir leis na fáiltais laistigh den Chomhphobal agus soláthar na n-earraí agus na seirbhísí sin a bhaineann le hearraí den sórt sin, lena n-áirítear seirbhísí cíosa.

2. Ballstát ar mian leis an beart dá dtagraítear i mír 1 a chur i bhfeidhm, cuirfidh sé an Coiste um CBL ar an eolas faoi.

3. Nuair a úsáidtear earraí nó seirbhísí a fuair na heagraíochtaí a thairbhíonn den díolúine a leagtar síos i mír 1 den Airteagal seo chun críocha seachas na críocha sin dá bhforáiltear i gCaibidil 4 de Theideal VIII de Threoir 2009/132/CE, beidh úsáid na n-earraí nó na seirbhísí sin faoi réir CBL faoi na coinníollacha is infheidhme tráth nach gcomhlíontar na coinníollacha le haghaidh na díolúine a thuilleadh.

- (5) Scriostar Airteagail 101, 102, 103, 104a agus 105;

⁹ Treoir 2009/132/CE ón gComhairle an 19 Deireadh Fómhair 2009 lena gcinntear raon feidhme Airteagal 143(b) agus (c) de Threoir 2006/112/CE a mhéid a bhaineann le díolúine ó cháin bhreisluacha ar allmhairiú deiridh earraí áirithe (IO L 292, 10.11.2009, lch. 5).

(5a) Cuirtear an méid seo a leanas in ionad Airteagal 104:

‘Airteagal 104

1. Féadfaidh an Ostair, i gcomúin Jungholz agus Mittelberg (Kleines Walsertal), an dara ráta caighdeánach a chur i bhfeidhm atá níos ísle ná an ráta comhfhreagrach a chuirtear i bhfeidhm sa chuid eile den Ostair ach nach lú ná 15 %.
2. Féadfaidh an Ghréig rátaí a chur i bhfeidhm suas go 30 % níos ísle ná na rátaí comhfhreagracha a chuirtear i bhfeidhm ar mhórthír na Gréige sna ranna seo a leanas: Lesbos, Cíos, Samas, na hOileáin Dhóideacanacha agus na Ciocláidí, agus ar oileáin Thassos, Sporades Thuaidh, Samatracae agus Skiros.
3. Féadfaidh an Phortaingéil, i gcás idirbheart arna ndéanamh i Réigiúin Féinrialaitheacha na nAsór agus Mhaidéara agus i gcás allmhairiú díreach isteach sna réigiúin sin, rátaí atá níos ísle ná na rátaí is infheidhme ar an mórthír a chur i bhfeidhm.
4. Féadfaidh an Phortaingéil ceann den dá ráta laghdaithe dá bhforáiltear in Airteagal 98(1) a chur i bhfeidhm maidir leis na dolaí ar dhroichid i limistéar Liospóin.’;

(5b) Cuirtear an tAirteagal seo a leanas isteach:

‘Airteagal 105a

1. Na Ballstáit a raibh rátaí laghdaithe atá níos ísle ná an t-íosmhéid a leagtar síos in Airteagal 98(1) á gcur i bhfeidhm acu nó a raibh díolúintí á ndeonú acu lena ngabhann in-asbhainteacht CBL arna íoc ag an gcéim roimhe sin, maidir le soláthar earraí nó seirbhísí a liostaítear i bpointí seachas pointí (1) go (6) agus (10c) d’Iarscríbhinn III, i gcomhréir le dlí an Aontais, an 1 Eanáir 2021, féadfaidh siad, i gcomhréir le hAirteagal 98(2), leanúint de na rátaí laghdaithe sin a chur i bhfeidhm nó de na díolúintí sin a dheonú, gan dochar do mhír 4 den Airteagal seo.

Na Ballstáit a raibh rátaí laghdaithe atá níos ísle ná an t-íosmhéid a leagtar síos in Airteagal 98(1) á gcur i bhfeidhm acu maidir le hidirbhearta i dtaca le tithíocht nach cuid de bheartas sóisialta iad, i gcomhréir le dlí an Aontais, an 1 Eanáir 2021, féadfaidh siad, i gcomhréir le hAirteagal 98(2), leanúint de na rátaí laghdaithe sin a chur i bhfeidhm.

Cuirfidh na Ballstáit in iúl don Choiste um CBL téacs phríomhfhorálacha an dlí náisiúnta agus na coinníollacha maidir le cur i bhfeidhm na rátaí laghdaithe agus na ndíolúintí sin a bhaineann le pointe (b) den dara fomhír d’Airteagal 98(2) tráth nach déanaí ná an ... [3 mhí tar éis dháta theacht i bhfeidhm na Treorach leasaithí seo].

Gan dochar do mhír 4 den Airteagal seo, féadfaidh Ballstáit eile rátaí laghdaithe atá níos ísle ná an t-íosmhéid a leagtar síos in Airteagal 98(1), nó díolúintí lena ngabhann in-asbhainteacht CBL arna íoc ag an gcéim roimhe sin, a chur i bhfeidhm, i gcomhréir leis an gcéad fhomhír d'Airteagal 98(2), maidir leis na soláthairtí earraí agus/nó seirbhísí céanna dá dtagraítear sa chéad fhomhír agus sa dara fhomhír den mhír seo agus faoi na coinníollacha céanna is infheidhme an 1 Eanáir 2021 sna Ballstáit dá dtagraítear sa chéad fhomhír agus sa dara fhomhír den mhír seo.

2. Na Ballstáit a raibh rátaí laghdaithe faoi bhun 12 % á gcur i bhfeidhm acu, lena n-áirítear rátaí laghdaithe atá níos ísle ná an t-íosmhéid a leagtar síos in Airteagal 98(1) nó a raibh díolúintí á ndeonú acu lena ngabhann in-asbhainteacht CBL arna íoc ag an gcéim roimhe sin, maidir le soláthar earraí agus seirbhísí seachas iad siúd a liostaítear in Iarscríbhinn III, i gcomhréir le dlí an Aontais, an 1 Eanáir 2021, féadfaidh siad, i gcomhréir le hAirteagal 98(1) agus (2), leanúint de na rátaí laghdaithe sin a chur i bhfeidhm nó de na díolúintí sin a dheonú go dtí an 1 Eanáir 2032 nó go dtí go nglacfar na socrúithe cinntitheacha dá dtagraítear in Airteagal 402, cibé acu is túisce gan dochar do mhír 4 den Airteagal seo.

3. Na Ballstáit a raibh rátaí laghdaithe nach lú ná 12 % á gcur i bhfeidhm acu maidir le soláthar earraí nó seirbhísí a liostaítear in Iarscríbhinn III, i gcomhréir le dlí an Aontais, an 1 Eanáir 2021, féadfaidh siad, i gcomhréir leis an gcéad fhomhír d'Airteagal 98(1), leanúint de na rátaí laghdaithe sin a chur i bhfeidhm, gan dochar do mhír 4 den Airteagal seo.

Cuirfidh na Ballstáit in iúl don Choiste um CBL téacs phríomhfhórála an dlí náisiúnta agus na coinníollacha maidir le cur i bhfeidhm na rátaí laghdaithe sin tráth nach déanaí ná an ... [3 mhí tar éis dháta theacht i bhfeidhm na Treorach leasaithí seo].

Gan dochar do mhír 4 den Airteagal seo, féadfaidh Ballstáit eile rátaí laghdaithe nach lú ná 12 % a chur i bhfeidhm, i gcomhréir leis an gcéad fhomhír d'Airteagal 98(1), maidir leis na soláthairtí earraí agus/nó seirbhísí céanna agus faoi na coinníollacha céanna is infheidhme an 1 Eanáir 2021 sna Ballstáit dá dtagraítear sa chéad fhomhír den mhír seo.

4. De mhaolú ar mhíreanna 1, 2 agus 3, na rátaí laghdaithe nó díolúintí maidir le breoslaí iontaise, earraí eile a bhfuil an tionchar céanna acu ar astaíochtaí gás ceaptha teasa, amhail móin, agus adhmaid a úsáidtear mar chonnadh tine, scoirfear de iad a chur i bhfeidhm faoin 1 Eanáir 2030, agus maidir le lotnaidicídí ceimiceacha agus leasacháin cheimiceacha, scoirfear de iad a chur i bhfeidhm faoin 1 Eanáir 2032.

5. Na Ballstáit ar mian leo, i gcomhréir leis an gceathrú fhomhír de mhír 1 den Airteagal seo, leis an tríú fhomhír de mhír 3 den Airteagal seo agus le hAirteagal 105b, na rátaí laghdaithe nach lú ná 12 %, na rátaí laghdaithe atá níos ísle ná an t-íosmhéid a leagtar síos in Airteagal 98(1), nó na díolúintí lena ngabhann in-asbhainteacht CBL arna íoc ag an gcéim roimhe sin, a chur i bhfeidhm, glacfaidh siad, faoi ... [18 mí dhéag tar éis theacht i bhfeidhm na Treorach leasaithí seo], na rialacha mionsonraithe lena rialófar feidhmiú na roghanna sin agus cuirfidh siad in iúl don Choiste um CBL téacs phríomhfhórála an dlí náisiúnta atá glactha acu.

6. Faoi 1 Iúil 2025, ar bhonn na faisnéise arna soláthar ag na Ballstáit, cuirfidh an Coimisiún tuarascáil faoi bhráid na Comhairle ina mbeidh liosta cuimsitheach lena léireofar na hearraí agus na seirbhísí dá dtagraítear i míreanna 1 agus 3 den Airteagal seo agus in Airteagal 105b a ndéantar na rátaí laghdaithe, lena n-áirítear na rátaí laghdaithe atá níos ísle ná an t-íosmhéid a leagtar síos in Airteagal 98(1), nó na díolúintí lena ngabhann in-asbhainteach CBL arna íoc ag an gcéim roimhe sin, a chur i bhfeidhm ina leith sna Ballstáit.’;

(5c) Cuirtear an tAirteagal seo a leanas isteach:

‘Airteagal 105b

Na Ballstáit a raibh rátaí laghdaithe á gcur i bhfeidhm acu nach raibh níos lú ná an t-íosmhéid de 5 % maidir le hidirbhearta i dtaca le tithíocht nach cuid de bheartas sóisialta iad, i gcomhréir le dlí an Aontais, an 1 Eanáir 2021, féadfaidh siad, i gcomhréir leis an gcéad fhomhír d’Airteagal 98(1), leanúint de na rátaí laghdaithe sin a chur i bhfeidhm. I gcás den sórt sin, ní bheidh an ráta laghdaithe atá le cur i bhfeidhm maidir leis na hidirbhearta sin níos lú ná 12 % amhail ón 1 Eanáir [2042].

Cuirfidh na Ballstáit in iúl don Choiste um CBL téacs phríomhfhorálacha an dlí náisiúnta agus na coinníollacha maidir le cur i bhfeidhm na rátaí laghdaithe sin tráth nach déanaí ná an ... [3 mhí tar éis dháta theacht i bhfeidhm na Treorach leasaithí seo].

Féadfaidh Ballstáit eile ráta laghdaithe nach lú ná 12 % a chur i bhfeidhm, i gcomhréir leis an gcéad fhomhír d’Airteagal 98(1), maidir leis na hidirbhearta dá dtagraítear sa chéad mhír den Airteagal seo faoi na coinníollacha céanna leis na coinníollacha is infheidhme an 1 Eanáir 2021 sna Ballstáit dá dtagraítear sa chéad fhomhír den Airteagal seo.

Chun críocha an tríú fhomhír d’Airteagal 98(1), measfar go dtagann na hidirbhearta dá dtagraítear san Airteagal seo faoi phointe (10) d’Iarscríbhinn III.’;

(6) i dTeideal VIII, scriostar Caibidil 4;

(7) i dTeideal VIII, Caibidil 5, scriostar Airteagail 123, 125, 128 agus 129;

- (8) in Airteagal 316, cuirtear an méid seo a leanas in ionad mhír 1:
- ‘1. Faoi réir gan ráta laghdaithe a bheith curtha i bhfeidhm maidir leis na saothair ealaíne, earraí agus seandachtaí inbhailithe lena mbaineann arna soláthar don déileálaí inchánach nó arna n-onnmhairiú aige siúd, deonóidh na Ballstáit an ceart do dhéileálaithe inchánach chun an scéim corrlaigh a chur i bhfeidhm ar na hidirbhearta seo a leanas:
- (a) soláthar saothar ealaíne, earraí nó seandachtaí inbhailithe a d’allmhairigh an déileálaí inchánach é féin;
- (b) soláthar saothar ealaíne arna soláthar don déileálaí inchánach ag a gcruthaitheoirí nó ag a gcomharbaí i dteideal;
- (c) soláthar saothar ealaíne arna soláthar don déileálaí inchánach ag duine inchánach seachas déileálaí inchánach.’;
- (9) in Airteagal 387, scriostar pointe (c);
- (9a) cuirtear an méid seo a leanas in ionad theideal Iarscríbhinn III:
- ‘Liosta sholáthairtí na n-earraí agus na seirbhísí a bhféadfar na rátaí laghdaithe agus an díolúine lena ngabhann in-asbhainteacht CBL dá dtagraítear in Airteagal 98 a chur i bhfeidhm maidir leo’;
- (10) Leasaítear Iarscríbhinn III i gcomhréir leis an Iarscríbhinn a ghabhann leis an Treoir seo;
- (10a) in Airteagal 53, cuirtear an mhír seo a leanas leis:
- ‘Ní bheidh feidhm ag an Airteagal seo maidir le ligean isteach sna himeachtaí dá dtagraítear sa chéad mhír i gcás ina mbeidh an freastal fíorúil.’;
- (10b) in Airteagal 54(1), cuirtear an fhomhír seo a leanas leis:
- ‘I gcás ina mbainfidh na seirbhísí le gníomhaíochtaí a shruthaítear nó a chuirtear ar fáil go fíorúil ar shlí eile, beidh an áit soláthair san áit ina bhfuil an duine neamh-inchánach bunaithe, a bhfuil a sheoladh buan aige nó a gcónaíonn sé de ghnáth.’;
- (10c) in Airteagal 59a, cuirtear an méid seo a leanas in ionad na bhfocal tosaigh:
- ‘Chun cánachas dúbailte, neamhchánachas nó saobhadh iomaíochta a chosc, féadfaidh na Ballstáit, maidir le seirbhísí a bhfuil a n-áit soláthair faoi rialú ag Airteagail 44, 45, 54(1), an dara fomhír, 56, 58 agus 59:’;

(10d) in Airteagal 81, cuirtear an méid seo a leanas in ionad na chéad mhíre:

‘Na Ballstáit nach raibh ag baint leas as an rogha faoi Airteagal 98 maidir le ráta laghdaithe a chur i bhfeidhm amhail ón 1 Eanáir 1993, féadfaidh siad, má bhaineann siad leas as an rogha faoi Airteagal 89, a fhoráil, i leith an tsoláthair saothar ealaíne, dá dtagraítear i bpointe (26) d’Iarscríbhinn III, go mbeidh an méid inchánach cothrom le codán den mhéid arna chinneadh i gcomhréir le hAirteagail 73, 74, 76, 78 agus 79.’;

(10e) in Airteagal 221, cuirtear an méid seo a leanas in ionad mhír 3:

‘3. Féadfaidh na Ballstáit daoine inchánach a scaoileadh ón oibleagáid a leagtar síos in Airteagal 220(1) nó Airteagal 220a chun sonrasc a eisiúint i ndáil le soláthairtí earraí nó seirbhísí a rinne siad ina gcríoch agus atá díolmhaithe, lena ngabhann nó nach ngabhann in-asbhainteacht CBL arna íoc ag an gcéim roimhe sin, de bhun Airteagail 98(2), 105a, 132, pointí (h) go (l) d’Airteagal 135(1), Airteagail 136, 371, 375, 376 agus 377, Airteagal 378(2) agus Airteagal 379(2) agus Airteagail 380 go 390c.’;

(10f) in Airteagal 288, an chéad mhír, cuirtear an méid seo a leanas in ionad phointe (2):

‘(2) luach na n-idirbheart atá díolmhaithe, lena ngabhann in-asbhainteacht CBL arna íoc ag an gcéim roimhe sin, de bhun Airteagal 98(2) nó Airteagal 105a;’.

Airteagal 2
Leasuithe ar Threoir (AE) 2020/285

In Airteagal 1 de Threoir (AE) 2020/285, cuirtear an méid seo a leanas in ionad phointe 15:

‘(15) Cuirtear an méid seo a leanas in ionad Airteagal 288:

‘Airteagal 288

1. Is iad na méideanna a leanas, ar leith ó CBL, a bheidh sa láimhdeachas bliantúil a bheidh mar thagairt chun an díolúine dá bhforáiltear in Airteagal 284 chur i bhfeidhm:

- (a) luach soláthairtí earraí agus seirbhísí, a mhéid a ngearrfaí cáin orthu dá mba dhuine inchánach neamhdhíolmhaithe a sholáthraigh iad;
- (b) luach na n-idirbheart atá díolmhaithe, lena ngabhann in-asbhainteacht CBL arna íoc ag an gcéim roimhe sin, de bhun Airteagal 98(2) nó Airteagal 105a;
- (c) luach na n-idirbheart atá díolmhaithe de bhun Airteagail 146 go 149 agus Airteagail 151, 152 agus 153;
- (d) luach na n-idirbheart atá díolmhaithe de bhun Airteagal 138 i gcás ina mbeidh feidhm ag an díolúine dá bhforáiltear san Airteagal sin;
- (e) luach na n-idirbheart eastáit réadaigh, idirbheart airgeadais dá dtagraítear i bpointí (b) go (g) d’Airteagal 135(1), agus seirbhísí árachais agus athárachais, mura idirbhearta coimhdeacha na hidirbhearta sin.

2. Ní chuirfear san áireamh diúscairtí sócmhainní caipitil inláimhsithe nó doláimhsithe duine inchánach chun an láimhdeachas dá dtagraítear i mír 1 a ríomh.’.

Airteagal 3

Trasuí

1. Na forálacha reachtaíochta, rialúcháin agus riaracháin is gá chun pointí 1, 3, agus 5 d’Airteagal 1, a chomhlíonadh a mhéid a bhaineann le scriosadh Airteagal 103 de Threoir 2006/112/CE, 8, 10a, 10b agus Airteagal 2, déanfaidh na Ballstáit iad a ghlacadh agus a fhoilsiú faoin 31 Nollaig 2024.

Cuirfidh siad na forálacha sin i bhfeidhm ón 1 Eanáir 2025.

Féadfaidh na Ballstáit na dlíthe, na rialacháin agus na forálacha riaracháin a chur i bhfeidhm maidir le hIarscríbhinn III, pointí (7) agus (13) a bhaineann le rochtain ar bheoshruith na n-imeachtaí nó na gcuariteanna a chumhdaítear leis na pointí sin, agus pointe (26) ón 1 Eanáir 2025.

2. Cuirfidh na Ballstáit téacs na bhforálacha reachtaíochta, rialúcháin agus riaracháin a ghlacfaidh siad sa réimse a chumhdaítear leis an Treoir seo in iúl don Choimisiún láithreach.

3. Nuair a ghlacfaidh na Ballstáit na forálacha dá dtagraítear i míreanna 1 agus 2, beidh tagairt iontu don Treoir seo nó beidh tagairt den sórt sin ag gabháil leo tráth a bhfoilsithe oifigiúil. Is iad na Ballstáit a chinnfidh an bealach le tagairt den sórt sin a dhéanamh.

Airteagal 3a

Ar bhonn measúnaithe an féidir réitigh a bheith ann a bheadh slán i bhfad na haimsire arna gcur in oiriúint don aois dhigiteach agus arna n-ailíniú leis an gcuspóir maidir le Córas um CBL bunaithe ar cheann scríbe, déanfaidh an Coimisiún, i gcás inarb iomchuí, togra reachtach a thíolacadh chun forálacha ábhartha na Treorach seo a leasú a mhéid a bhaineann leis an scéim corrlaigh a leagtar síos i gCaibidil 4 de Theideal XII de Threoir 2006/112/CE.

Airteagal 4

Teacht i bhfeidhm

Tiocfaidh an Treoir seo i bhfeidhm an fichiú lá tar éis lá a foilsithe in *Iris Oifigiúil an Aontais Eorpaigh*.

Airteagal 5

Seolaithe

Is chuig na Ballstáit a dhírítear an Treoir seo.

Arna déanamh sa Bhruiséil,

Thar ceann na Comhairle
An tUachtarán

IARSCRÍBHINN

Leasaítear, leis seo, Iarscríbhinn III a ghabhann le Treoir 2006/112/CE mar a leanas:

1. Cuirtear an méid seo a leanas in ionad phointí 3, 4, 5, 6, 7, 8, 10, 10a, 11, 13, 15, 18 agus 19:

(3) Táirgí cógaisíochta a úsáidtear chun críoch míochaine agus tréidliachta, lena n-áirítear táirgí a úsáidtear le haghaidh frithghiniúna agus táirgí cosanta sláintíochta do mhná, agus táirgí sláinteachais ionsúiteacha;

(4) Trealamh leighis, fearais, feistí, ítimí, áiseanna agus fearas cosanta sláinte, lena n-áirítear maisc cosanta sláinte, atá ceaptha de ghnáth lena n-úsáid i gcúram sláinte nó lena n-úsáid ag daoine faoi mhíchumas, earraí atá riachtanach chun míchumas a chúiteamh agus a sháru, chomh maith le hoiriúnú agus deisiú na n-earraí sin, agus iad a fháil ar cíós nó ar léas;

(5) Iompar paisinéirí agus iompar na n-earraí a ghabhann leo, amhail bagáiste, rothair, lena n-áirítear rothair leictreacha, mótarfheithiclí nó feithiclí eile, nó soláthar seirbhísí a bhaineann le hiompar paisinéirí;

(6) Leabhair, nuachtáin agus tréimhseacháin a sholáthar, lena n-áirítear ar iasacht ó leabharlanna, bíodh siad ar mhodhanna tacaíochta fisiceacha nó curtha ar fáil go leictreonach nó an dá rud (lena n-áirítear bróisiúir, bileoga agus ábhar clóite comhchosúil, leabhair pictiúr, líníochta nó dathúcháin do leanaí, ceol clóite nó i bhfoirm lámhscríbhinne, léarscáileanna agus cairteacha hidreagrafacha nó cairteacha comhchosúla), seachas foilseacháin atá dírithe go hiomlán nó den chuid is mó ar fhógraíocht agus seachas foilseacháin arb é atá iontu go hiomlán nó den chuid is mó ábhar fise nó ceol inchloiste; táirgeadh foilseachán eagraíochtaí neamhbhrabúsacha agus seirbhísí a bhaineann le táirgeadh den sórt sin;

(7) Cead isteach chuig seónna, amharclanna, sorcais, aontáí, páirceanna siamsaíochta, ceolchoirmeacha, músaeim, zúnna, pictiúrlanna, taispeántais agus imeachtaí agus saoraidí cultúrtha comhchosúla nó rochtain ar bheoshruthú na n-imeachtaí nó na gcuariteanna sin nó an dá rud;

(8) Glacadh seirbhísí craoltóireachta raidió agus teilifíse agus craoladh gréasáin na gclár céanna arna soláthar ag soláthraí seirbhíse meán; seirbhísí rochtana idirlín a sholáthraítear mar chuid den bheartas digitithe, arna sainiú ag na Ballstáit;

(10) Tithe a sholáthar agus a thógáil, mar chuid de bheartas sóisialta, mar atá sainithe ag na Ballstáit; tithe agus teaghaisí príobháideacha a athchóiriú agus a athrú, lena n-áirítear iad a scartáil agus a atógáil, agus iad a dheisiú; maoin dhochorraithe a ligean ar cíós le haghaidh úsáid cónaithe;

(10a) Foirgnimh phoiblí agus foirgnimh eile a úsáidtear le haghaidh gníomhaíochtaí ar mhaithe le leas an phobail a thógáil agus a athchóiriú;

(11) Soláthar earraí agus seirbhísí de chineál a bheartaítear de ghnáth lena n-úsáid i dtáirgeadh talmhaíochta ach gan earraí caipitiúla ar nós innealra nó foirgneamh a áireamh; agus, go dtí an 1 Eanáir 2032 soláthar lotnaidicídí ceimiceacha agus leasachán ceimiceach;

- (13) Cead isteach chuig imeachtaí spóirt nó rochtain ar bheoshruth na n-imeachtaí sin nó an dá rud; áiseanna spóirt a úsáid, agus ranganna spóirt nó ranganna aclaíochta coirp a sholáthar freisin nuair a bhíonn siad beoshruthaithe;
- (15) Soláthar earraí agus seirbhísí ag eagraíochtaí atá ag gabháil d'obair leasa nó slándála sóisialta mar atá sainithe ag na Ballstáit agus a n-aithnítear iad a bheith tiomanta don dea-bhail shóisialta ag na Ballstáit, a mhéid nach bhfuil na hidirbhearta sin díolmhaithe de bhun Airteagail 132, 135 agus 136;
- (18) Soláthar seirbhísí a chuirtear ar fáil i dtaca le séarachas, glanadh sráide, bailiú bruscair agus cóireáil dramhaíola nó athchúrsáil dramhaíola, seachas soláthar seirbhísí den sórt sin ag comhlachtaí dá dtagraítear in Airteagal 13;
- (19) Soláthar seirbhísí deisithe d'fhearais tí, bróga agus earraí leathair, éadaí agus línéadach tí (lena n-áirítear deisiú agus athrú);

2. Cuirtear na pointí seo a leanas isteach:

- (10c) Grianphainéil a sholáthar agus a shuiteáil ar theaghaisí príobháideacha, ar thithíocht agus ar fhoirgnimh phoiblí agus foirgnimh eile a úsáidtear le haghaidh gníomhaíochtaí atá chun leas an phobail nó grianphainéil a sholáthar agus a shuiteáil cóngarach dóibh;
- (11a) Eachaithe beo agus soláthar seirbhísí a bhaineann le heachaithe beo;

3. Cuirtear na pointí seo a leanas leis:

- (22) Soláthar leictreachais, téimh ceantair agus fuaraithe ceantair, agus bithgháis a tháirgtear leis an mbunábhar a liostaítear i gCuid A d'Iarscríbhinn IX a ghabhann le Treoir 2018/2001; soláthar agus suiteáil córas téimh íseal-astaíochtaí an-éifeachtúil lena gcomhlíontar na tagarmharcanna d'astaíochtaí a leagtar síos in Iarscríbhinn V de Rialachán (AE) 2015/1189 ón gCoimisiún agus in Iarscríbhinn V de Rialachán (AE) 2015/1185 ón gCoimisiún faoi seach agus ar tugadh lipéad fuinnimh an Aontais dóibh chun a thaispeáint go bhfuil an critéar dá dtagraítear in Airteagal 7(2) de Rialachán (AE) 2017/1369 á chomhlíonadh; agus, go dtí an 1 Eanáir 2030, gás nádúrtha agus adhmaid a úsáidtear mar chonnadh tine;
- (23) Plandaí beo agus táirgí bláthanna eile, lena n-áirítear bleibíní, cadás, fréamhacha agus a leithéidí, bláthanna gearrtha agus duilliúr ornáideach;
- (24) Éadaí agus coisbheart leanaí; soláthar suíochán gluaisteáin do leanaí;
- (25) Soláthar rothar, lena n-áirítear rothair leictreacha; seirbhísí fruilithe agus deisithe rothar den sórt sin;
- (26) Soláthar saothar ealaíne, earraí agus seandachtaí inbhailithe a liostaítear in Iarscríbhinn IX, Codanna A, B agus C;

(27) Seirbhísí dlí a sholáthraítear do dhaoine faoi chonradh oibre agus daoine dífhostaithe in imeachtaí cúirte oibreachais, agus seirbhísí dlí a sholáthraítear faoin scéim um chúnamh dlíthiúil, arna sainiú ag na Ballstáit;

(28) Uirlisí agus trealamh eile de chineál a bheartaítear de ghnáth le húsáid i seirbhísí tarrthála nó i seirbhísí garchabhrach nuair a sholáthraítear iad do chomhlachtaí poiblí nó eagraíochtaí neamhbhrabúsacha atá gníomhach i gcosaint shibhialta nó pobail;

(29) Soláthar seirbhísí i ndáil le hoibriú long solais, tithe solais nó áiseanna loingseoireachta agus seirbhísí tarrthála eile lena n-áirítear eagrú agus cothabháil na seirbhíse bád tarrthála;

4. Scriostar pointe 14.
